

TEZAU LITURGIC

4 APRILIE

ACATISTUL SF.CUVIOASE-MUCENIȚE MARIA LILIANOVA DE LA GATCIN II



MOSCOVA, 2000



Акафист

Святой преподобномученице

Марии Гатчинской

Кондак 1

Избранная угоднице и страданице Христова, преподобномученице мати Марие, в земли Гатчинстей верным возсияла еси подвигом твоим смиренным. И ныне похвальная восписуем ти, любовью творящий память твою, да твоего заступления пред Господом сподобльшися, не престанем пети тебе во умилении сердечном:

Радуйся, преподобномученице Марие, смиренная страданице и теплая о нас молитвеннице.

Икос 1

Ангели Божии удивишася, егда еще во плоти сущи, неустанною молитвою и дарованьми духовными небесному воинству подражати сподобилася еси, славословящи Господа Сил. И в Церкви земней, воинствующей за правду Христову во времена безбожия, веру непоколебимую соблюла еси. Да и мы на твой образ взирающе, воспоем тебе таковая:

Радуйся, христианского благочестия богоносная отрасли.

Радуйся, кротость ангельскую явившая.

Радуйся, скорбь земную на радость пременившая.

Радуйся, утешение небесное улучившая.

Радуйся, сердце свое горе устремившая.

Радуйся, всю жизнь Христу Богу посвятившая.

Радуйся, любви Божия посланнице.

Радуйся, веры православных неугасимый пламене.

Радуйся, преподобномученице Марие, смиренная страдальце и теплая о нас молитвеннице.

Кондак 2

Витии многовещаннии не возмогут воспети подвиги твоя достойно, преподобная мати, занеже недугом лютым поражена бысть во дни юности твоя и неустанно Христу последующи, в келлии своей пребыла еси во вся дни жития своего, воспевающи Господу Сил: Аллилуиа.

Икос 2

Плоть твоя посечена бысть болезнию тяжкою попущением Божиим, да не плод мирских дел скорогиблущий принесеши в житии твоём, но нетленный плод духовных благодати. Велие дерзновение ко Христу приобрела еси, да и мы

велегласно воспоем тебе таковая:

Радуйся, воли Божией с кротостию и смирением последовавшая.

Радуйся, мученичества твоего благодать приимшая.

Радуйся, на Христа распятого во вся дни жития твоего взиравшая.

Радуйся, крест твой вослед Ему подъемшая.

Радуйся, тишиною молитв Богу предстоящая,

Радуйся, за весь мир Господа умоляющая.

Радуйся, помощнице в скорбех унывающим.

Радуйся, отверзающая очи духовно слепым.

Радуйся, преподобномученице Марие, смиренная страдальце и теплая о нас молитвеннице.

Кондак 3

Всемиловитый Господь, укрепляя дух твой скорбию и тяготою безвременною, исторгнув тя из юдоли земных сует, Иову многострадальному тебе уподобив, дарова тебе чистоту сердечную. Ты же, праведная Марие, имущи, любовь Божию, из глубины души воспевала еси Ему: Аллилуиа.

Икос 3

Яко злато в горниле бурею помыслов, на дух воюющих, искушена бысть мати Марие.

Кротостью и слезами вопияла еси ко Христу

Богу и тишину Его духовным подвигом
стяжавши, яко миром благоуханным, напоена
бысть. Мы же, благодать Божию восприявше,
воспеваем тебе сицевая:

Радуйся, леств вражию терпением поправшая.

Радуйся, душу твою скорбьми очистившая.

Радуйся, страдалице, милосердием к человеку
преисполненная.

Радуйся, страстотерпице, ближняго своего, яко
сама себе, возлюбившая.

Радуйся, молитвеннице, дар утешения
страждущих стяжавшая.

Радуйся, яко дивная голубица, душею чистою к
небесем воспарившая.

Радуйся, венец славы нетленные от Бога
приявшая.

Радуйся, скорби временныя в радость вечную
претворившая.

Радуйся, преподобномученице Марие,
смирренная страдалице и теплая о нас
молитвеннице.

Кондак 4

Яко бисер безценный обретоша ты в
молитвенном уединении благочестивии людие,
не немощь узревше в тебе, а ум, горняя
мудрствующий, и за словом утешения
притекающе к тебе, утешени быша духовно

сторицею, воспевающе великому и всещедрому Богу: Аллилуиа.

Икос 4

Верою и любовью приступала еси к Чаше жизни, неосужденно приемлющи Тело и Кровь Христову, да укрепит предызбранный ты Христос, и да живет в тебе и действует. Тако просвещена Духом Божиим, вся дни живота во Христе прожила еси, да и мы воспоим тебе таковая: Радуйся, восприимшая светозарную благодать от божественного свыше промысления.

Радуйся, светом трисолнечным душу свою просветившая.

Радуйся, ангелов радостное удивление и человеков благоговейное почитание.

Радуйся, демонов горькое рыдание и ожесточение.

Радуйся, язв телесных и скорбей душевных наших целительнице.

Радуйся, всегда о нас пред Богом ходатаице.

Радуйся, немощи наша молитвами твоими врачующая.

Радуйся, образом жития твоего жизнь нашу ко спасению направляющая.

Радуйся, преподобномученице Марие, смиренная страдалице и теплая за нас молитвеннице.

Кондак 5

Мудрым девам уподобившись, сохранила еси елей молитв и милосердия в сретение Господа, да не с угасшим светильником срящещи явление Его, воспеваючи Всемиловитому Богу, тако промышляющему о верных рабех Своих: Аллилуиа.

Икос 5

Зрящи землю Российскую в духовный мрак повергаемую, духом сокрушалася еси и чистые души дев юных благовестием Христовым согревала еси, привлекаючи их к служению Богу и ближнему в годину безбожия. Темже и мы, подражающе тебе, чистою любовью к Богу и ближнему востецем, поюще тебе таковая: Радуйся, чтущия тя от всяких напастей избавляющая.

Радуйся, терпением твоим нас назидаящая.

Радуйся, свещею души твоя нас просвещающая.

Радуйся, недугующим руку помощи подающая.

Радуйся, безбожных и лукавых вразумление,

Радуйся, образе тайнаго крестоношения.

Радуйся, чистоты небесная сияние,

Радуйся, веры, надежды и любви сочетание.

Радуйся, преподобномученице Марие, смиренная страдальце и теплая о нас молитвеннице.

Кондак 6

Священномученик митрополит Вениамин посети келлию твою и с тобою беседовав, благословение тебе на иноческий подвиг подаде, да укрепит тя подвигоположник Господь, во еже пети Ему: Аллилуиа.

Икос 6

Зрим монашеское пострижение твое во дни гонений в храме Покрова Богородицы его же с благоговением воспрिया еси. Темже исполнившая заповеди Христовы и иноческие обеты, подвигаеши нас ублажати тя и воспевати тебе таковая:

Радуйся, сопричастнице новомучеником церкви Российския.

Радуйся, духом исповедничества ведомая.

Радуйся, своим крестоношением в Царство Небесное притекшая.

Радуйся, язвы Господа твоего на телеси своем понесшая.

Радуйся, яко тобою постигаем правду Божию,

Радуйся, яко тобою последуем Христу.

Радуйся, гонимых за веру в подвиге укреплявшая,

Радуйся, молитвами твоими путь их мученичества осветившая.

Радуйся, преподобномученице Марие,

смиренная страдальце и теплая о нас молитвеннице.

Кондак 7

Прикровен бысть подвиг твой, но по слову Господню, «не может град укрытись верху горы стоя. Ниже вжигают светильника, и поставляют его под спудом, но на свещнице и светит всем, иже в храмине суть». Тако и свет добродетелей твоих, преподобная мати Марие, возсия людям страждущим, да возревше на него, обретут упование неложное на Всесильного во святых Своих Бога, воспевающе Ему: Аллилуиа.

Икос 7

Келлия твоя, иконами преукрашенная и благодатию молитв твоих благоуханная, небо земное для страждущих людей бысть, иже во множестве притекаху к тебе, духовного совета, молитв и утешения взыскующе. Они же, радостию духовною упоении, силою Господнею укрепляемии на предлежащий им подвиг, воспеваху тебе таковая:

Радуйся, немощь естества человеческого победившая.

Радуйся, тесным путем ко спасению пришедшая.

Радуйся, мужества духовного сокровище.

Радуйся, унывающих в скорбех прибежище.

Радуйся, немудрыя смирением умудрившая.
Радуйся, малодушныя духом укрепившая.
Радуйся, явившая нам крепость упования,
Радуйся, даровавшая нам свет небеснаго
радования.

Радуйся, преподобномученице Марие,
смиренная страдальце и теплая о нас
молитвеннице.

Кондак 8

Веру отеческую безбоязненно исповедующи,
богомудрый глагол священномученика
Вениамина в сердце своем восприяла еси, яко
не люди спасают Церковь, но Кровию Своею
Христос Бог наш. Да и мы, дерзновение твое
мученическое зряще, страстотерпице Христова,
малодушие и лукавство от сердец наших
отринем, воспевающе Богу: Аллилуиа.

Икос 8

В немощи лежащи, совершала еси молитвы к
милосердному Богу, да простит грехи людския,
да приведет всех к истинней вере, да обратит
неверныя, да восставит падшия. И благоугодна
бысть Богу слезная молитва твоя, мати Марие.
Темже и мы, дерзновению твоей святости
дивящися, воспоем тебе сицевая:
Радуйся, утешением горечь скорбей
улаждающая.

Радуйся, уповати на волю Божию нас
призывающая.

Радуйся, яко не сокрыто бысть от тебе многое
потаенное.

Радуйся, яко молитвы твоя достигоша небес.

Радуйся, козни диавольския поправшая.

Радуйся, руце твои к щедрому Богу
простиравшая.

Радуйся, враги вразумляющая.

Радуйся, теплотою молитв твоих хладная сердца
к Богу обращающая.

Радуйся, преподобномученице Марие,
смирренная страдальце и теплая о нас
молитвеннице.

Кондак 9

Единому втайне моления приносила еси
Владыце Христу, дар утешения скорбящих
стяжала еси, имже посещаеши немощныя люди.
Темже и мы по молитвам твоим, святая
угоднице, милости Божия сподобившися, поем
во умилении сердец: Аллилуиа.

Икос 9

Далече от града Гатчины изыде слава
добродетелей твоих, и множество людей из иных
градов и весей, тебе, еще в многоболезненном
твоем телеси сущей, воздаяху хвалу Богу,
святость твою именующе, да и мы с ними

прославляем Божию милость и вопием ти:
Радуйся, твоими молитвами нас к Богу
приводящая.

Радуйся, к Свету Невечернему души
обращающая.

Радуйся, благословенная невесто Христова.

Радуйся, избраннице Небеснаго Отца.

Радуйся, безумие мира житием своим
обличающая.

Радуйся, образом благочестия нас обогащающая.

Радуйся, силу веры нам явившая.

Радуйся нищетою духовною дары Духа Святаго
стяжавшая.

Радуйся, преподобномученице Марие,
смирренная страдальце и теплая о нас
молитвеннице.

Кондак 10

Всякое естество удивися сиянию в тебе
благодати и богатству добродетелей:
ангелоподобней чистоте твоей, мужеству в
скорбех и страданиях, в немощем женском
телеси явленному, и многому состраданию к
людem. Сего ради, преподобная мати, поем
прославившему тя Господу: Аллилуиа.

Икос 10

Не возможе враг спасения диавол помрачить
подвиги твоя, имиже возсияла еси на радость и

утешение всем. И в ангельском чине служение свое совершаючи, учила еси православныя люди быти верными Христу до смерти, и любовь Его в сердцах своих возгревати непрестанно, да не устрашат страдальцев узы, темницы, мучения и смерть. Темже глаголем тебе таковая: Радуйся, исповедания безстрашного образе. Радуйся, щедрот Божиих вместилище. Радуйся, пасхальною радостью исполненная. Радуйся, к небесному радованию страданиями востекшая. Радуйся, от нечестия безбожного души отвращающая. Радуйся, терпение в скорбех явившая. Радуйся, Божественных даров приятилище. Радуйся, милостей Господних сокровище. Радуйся, преподобномученице Марие, смиренная страдалице и теплая о нас молитвеннице.

Кондак 11

В нощи приидоша в жилище твое мучитилие, и многоболезненное тело твое на колесницу ввергоша, болезнь и поругание тебе творяще. Ты же, преподобномученице Марие, устремивши ум твой ко Господу, воспевала еси Ему: Аллилуиа.

Икос 11

Сквозе огнь мучений и море слез возшла еси
изволением Божиим в покой вечный. Мучителие
же твои недоумеваху: како тоlikое множество
людей свидетельствова славу святости твоея.
Темже и мы, прославляюще подвиги твоя,
святая мученице, глаголем ти сице:
Радуйся, луче солнечная Царства Небеснаго.
Радуйся, назнаменованная даром избрания.
Радуйся, мрака душевнаго отгнание,
Радуйся, молитвы богоугодныя стяжание.
Радуйся, истинный путь верным указавшая.
Радуйся, венец от Господа Сил приявшая.
Радуйся, освятившая молитвою град Гатчину,
Радуйся, святынею мощей твоих осиявшая ю.
Радуйся, преподобномученице Марие,
смирренная страдалице и теплая о нас
молитвеннице.

Кондак 12

Не приложися плоти и крови, но уразумевши
волю Господню, принеслася еси яко жертва
непорочная на заклание. В темнице, в
последние дни земнаго странствования твоего
слова апостола произносила еси: «Кто ны
разлучит от любве Божия, скорбь ли, или
теснота, или гонение, или глад, или нагота, или
беда, или меч». Темже вся простивши мучителем

твоим, блаженная Марие, воспевала еси Богу: Аллилуиа.

Икос 12

Ангел от Господа послан бысть к тебе в темницу, да восхитит душу твою святую и в веселие любящих Бога введет, да и мы, освящаемы кровьми мучений твоих, воспоем тебе таковая: Радуйся, ангельским ликом сочетавшаяся.

Радуйся, добродетелей плоды Богу принеся.

Радуйся, очищение сердцам нашим у Христа просящая.

Радуйся, от скверны греховныя тыя врачующая.

Радуйся, от мучительства бесовскаго избавляющая.

Радуйся, припадающих к тебе с молитвою милующая.

Радуйся, лик праведников Санкт-Петербургских украшающая.

Радуйся, в сонме новомучеников Российских просиявшая.

Радуйся, преподобномученице Марие, смиренная страдалице и теплая о нас молитвеннице.

Кондак 13

О святая преподобномученице Марие, зрим юность твою, в борениях духовных и смирении протекшую, зрим зрелость твою в богомыслии и

молитве закаленную, зрим и кончину твою мученическую. Зрим ныне и славу твою небесную! Будь теплая ходатаице и заступнице о нас пред Господом, да присно поем Ему: Аллилуиа. (Сей кондак читается трижды)

Молитва

О преподобномученице святая, мати Марие, ангелов похвало, новомучеников и исповедников славо! Призри на нас грешных, предстоящих и молящихся тебе, яко теплой заступнице и смиренной ходатаице пред Господом, Ему же молитвою и постом, верою и терпением скорбей угодила еси. Тебе бо, яко светильник веры Христовы даром прозорливости и чудотворений ущедри Господь. Виждь слезы наша и покаяние, умоли милостиваго Бога даровати нам (имена) грехов прощение, к ближнему любовь нелицемерную, в вере крепость неизменную, в житии целомудрие и благочестие.

О, преблагая мати, осени твоим благоволением всех, чтущих святую память твою. Испроси молитвами твоими у Всемиловитова Бога нам в скорбех – утешение, в бедах – избавление, в болезнях – исцеление.

Умоли, преподобномученице святая, милостиваго Создателя нашего, да не одолеет злоба неизреченная благости Его, и да

сподобимся дни жизни сея привременныя во всяком благочестии и чистоте пожити, славяще Отца и Сына и Святаго Духа ныне и присно и во веки веков. Аминь.

